

BON BINI FESTIVAL A HAYA SU POPULARIDAD MERECE

ORANJESTAD(AAN)—Bon Bini Festival cu e aña aki a re-emplaza Watapana Festival despues di cinco aña, por fin a logra haya su popularidad mereci.

E prome simannan desde april, e cantidad di hendenan local cu tabata bishita e festival aki den plaza di forti Fort Zoutman tabata 5 pa 10, compara cu decenas di turista pero cu no tabata yena e plaza.

Desde mei mei di luna di juni, por a nota un crecimiento grandi di no solamente bishitantenan pero tambe hendenan local cu ta bay e festival aki, y su popularidad ultimo tres siman cu a pasa a bira asina grandi cu lo no dura mucho mas cu e plaza aki lo ta mucho chi-

quito pa e cantidad di bishitantenan.

Tin tres siman caba cu e publico ta yena e plaza den forti dilanti di museo y cu ni pa para no ta keda lugar.

E shownan cu ta ser presenta ta shownan di nivel y cu especialmente e turistanan ta gusta masha hopi.

Atraccionnan grandi pa turistanan ta gruponan di baile, manera Simadanza, Teatro di Danza Arubano of di Arubaanse Dans en Balletschool, tambe gruponan di baile manera Arubaile, grupo di Noord, grupo di baile di sinta di Sra. Elsa Geerman y e popular Flor di Palisia cu ta ricibi ovacionnan grandi durante cada presentacion.

E combinacion cu e gruponan di baile, ta musica di agrupacionnan tipico cu ta toca nos wals, tumba, mazurca, danza y tambe de vez en cuando un caha di orgel manera ultimamente Sorpresa cu tabata masha gusta tambe.

E grupo di Criollo di Boysie Croes, pa su variacion, y tipico los Estudiantes cu Lirios del Campo y otro gruponan similar tambe a logra exito grandi ya cu esakinan ta locual e turistanan kier mira ariba nos isla.

Recientemente na un hotel grandi mes, DIA-RIO tabata presente na momento cu varios turista a reclama cu nan a bin Aruba pa scucha musica di Aruba y no musica

Rock cu nan ta tende dia-riamente na emisoreanan na Merca.

Di e gruponan local, actualmente ta Holiday Inn cu su show di Simadanza y Aruba Beach Club cu su shownan di artistanan local, ta esnan cu ta cosechando exito cu no unicamente presentacionnan di folklore di Aruba pero tambe di musica di nos isla.

Na Bon Bini Festival, e toque special cu a trece e popularidad ta e cushina cu cuminda criollo di tur siman, especialmente tambe e atraccion di Sr. Eduardo Ellis di Papiamento Restaurant cu tur siman ta bende su Caramaris (inktkvis) cu pan bati y su cari cari cu pan bati, algo cu ta cay masha na agrado di e bishitantenan y cu tur siman ta caba den rato di ora.

E standnan di artesanía tambe ta menos cu na Watapana Festival di Antes, pero locual ta ser bendi ta souvenirnan cu e bishitantenan ta gusta masha hopi tambe.

Algo cu tambe ta un atraccion na e festival aki ta e stand cu cos dushi special tipico. Por haya aki cocoda, y tur sorto di pasa boca local cu turistanan ta gusta masha hopi y no tabata conoce.

E bar ta den man semanalmente di un di e hotel-

nan y ademas di ta open bar, tur siman nan tin un bebida especial pa Bon Bini pa e bishitantenan.

Bon Bini Festival a pega, pero lo no dura mucho cu algo lo mester wordo haci pa limita e publico ya cu e popularidad ta asina grandi ultimo tres simannan, kizas ta door di e temporada di vacacion tambe cu e ta un full house tur siman.

Un reclamo so cu tabata tin ta habrimiento di e porta, ya cu esaki ta tuma lugar exactamente 6.30 or mientras cu tin turistanan cu ta para pafó varios minuut caba sperando, biniendo sea cu taxi of cu bus di tempran y despues di tanto espera na hotel ta haya nan mes cu mas espera pa porta habri.

Diamars ultimo, Teatro di Danza Arubano bao direccion di Diana Antonette y Tipico Lirios del campo a percura pa e show tanto di baile como di musica tipico.

Por bisa tambe cu e festival aki ta na caminda pa bira un exito den su prome aña y si e sigui asina pa resto di e aña aki, lo ta vale la pena pa pensa ariba otro atraccion turistico acerca tambe pa futuro, ya cu shownan tipico y cu bailenan folklorico ta masha in cerca nos bishitantenan.

STATEN NO TABATA PREPARA PA REUNI CU SINDICATO

ORANJESTAD(AAN)—Na Curacao ayera e reunion cu Parlamento y sindicato di empleadonan di di gobierno AVBo no por a tuma lugar ayera ya cu e miembronan di Staten di Antillas no a studia e documentonan cu ta contene e contra proposicion di e sindicato. Practicamente ayera a parti e documento na e miembronan di manera e miembronan di Staten ayera no tabata na altura di su contenido, siendo

cu for di 19 di april e sindicato a manda e documentonan pa Staten di Antillas.

Otro punto di e caso aki ta cu e parlamentario nan no tabata sa mes kico e sindicato kier a papia ariba.

Esaki a trece cune masha malcontento cerca e sindicato segun DIARIO tin entendi ya cu despues di 4 luna ainda e parlamentarianan no a studia e documentonan y a ser bisa ayera mainta cu ta mihor pa e parlamento

studia esakinan y despues yama e sindicato pa dialogo.

E sindicato ta keda para ariba mantencion di cupo di trabao di empleadonan publico.

ABVO kier papia solamente ariba nan contra proposicion y no ariba e 15 porciento di entrega.

AUTO A BOLTER

ORANJESTAD(AAN)—Diamars atardi a drenta informa na polis cu un auto a bolter na e carretera cu ta bay Natural Bridge Mesora Patruxa di Santa Cruz a acudi na e sitio y a riapra banda di e auto cu a bolter tabata tin dos turista cu a hiba susto serio. Segun nan declaracion, esta di esun cu tabata maneja e auto di huur,

nan tabata biniendo di Natural Bridge. Biniendo abao na un lugar caminda e carretera ta splits den un parti di tera y otro di asfalt, e dama tratando pa subi esun di tera a realiza un maniobra y e auto a bolter.

No tabata tin heridos pero si un daño material di cinco mil florin.



MILK-BONE
BRAND

Buskuchi' Kachó

PA BO KACHO TIN DJENTE SANO Y LIMPI

openibel pa kacho chiki,
mediano y grandi



distr. Hector Henriquez B. Inc.
Curacao: Caracasbaaiweg 38. Tel. 613266
Aruba: Tomatenstraat 8. Tel 23821